

Vísindasjóður Landspítala auglýsir hvatningarstyrki

Vísindasjóður Landspítala auglýsir til umsóknar þrjá hvatningarstyrki, hvern að upphæð 5 milljónir króna. Umsóknarfrestur er til og með 26. október 2014.

Umsóknir

Vísindaráð Landspítala metur umsóknir fyrir hönd Vísindasjóðs. Nota skal sérstakt umsóknareyðublað Vísindaráðs. Sjá einnig leiðbeiningar vegna umsókna um hvatningarstyrk. Nánari upplýsingar veitir Eygló Ingadóttir á vísinda- og þróunarsviði s. 5705 visindarad@landspitali.is.

Markmið

Tilgangur hvatningarstyrkja Vísindasjóðs er að styrkja rannsóknir sterkra rannsóknarhópa á Landspítala sem þegar hafa öðlast alþjóðlega viðurkenningu, m.a. með birtingu vísindagreina í alþjóðlegum vísindaritum og öflun stórra styrkja.

Nánari lýsing

Veittir verða þrír styrkir, hver að upphæð 5 milljónum króna. Lögð er áhersla bæði á grunnrannsóknir og klínískar rannsóknir. Styrkirnir eru ætlaðir til stórra verkefna sem líkleg eru til að leiða til birtinga í virtum, alþjóðlegum vísindaritum. Vísindaverkefnið skal hafa skýr markmið og vel skilgreinda og varðaða verkefnisáætlun. Í umsókninni skal gera skýra grein fyrir væntingum um afrakstur og ávinning verkefnisins.

Styrkirnir verða veittir á grundvelli faglegs mats á gæðum rannsóknarverkefna og ritvirkni aðalumsækjanda. Sérstaklega verður horft til þess hvort umsækjendur séu í innlendu og erlendu samstarfi, hvort þeir hafi sýnt frumkvæði í rannsóknum sínum og séu aðalhöfundar á greinum. Einnig verður tekið tillit til áhrifastuðuls tímarita og fjölda tilvitnana. Aðrir þættir sem bera merki um alþjóðlega viðurkenningu eins og t.d. boðsfyrirlestrar, störf sem andmælendur við doktorsvarnir, verðlaun, seta í ritstjórn vísindarita eru einnig metnir.

Sami einstaklingur getur aðeins sótt um einn styrk sem verkefnisstjóri. Ekki er ætlast til að þeir sem fengið hafa samsvarandi hvatningarstyrk LSH áður sækji um styrk í þetta sinn.

Verkefnisstjóri skal:

- vera í föstu starfi á Landspítala í a.m.k. 20% starfshlutfalli.
- hafa mikla reynslu af stjórnun stórra rannsóknarverkefna sem hafa leitt til birtinga í alþjóðlegum virtum vísindaritum.
- hafa aflað stórra styrkja til vísindarannsókna.

Eftirfarandi atriði vega mjög þungt þegar umsóknir eru metnar:

- Verkefnið stuðli að uppbyggingu á alþjóðlegri vísindalegri þekkingu og aukinni þátttöku í alþjóðasamstarfi á sviði vísinda.
- Verkefnið miði að vel skilgreindum ávinningi fyrir skjólstæðinga spítalans.
- Verkefnið styrki rannsóknarhópa og þekkingarklasa innan spítalans.
- Verkefnið feli í sér samstarf öflugs hóps vísindamanna og þátttöku meistara- og/eða doktorsnema.
- Framvinduskýrslur verkefnisstjóra vegna fyrri styrkveitinga úr Vísindasjóði.
- Ávinningur styrkveitingar fyrir framgang verkefnisins sem sótt er um.
- Hvernig tryggja skal fjármögnun verkefnisins ef fjárhagsáætlun gerir ráð fyrir hærri fjárútlátum en fimm milljónum króna.

Úthlutun styrkja

Gert er ráð fyrir að úthlutun styrkja fari fram í byrjun desember 2014. Verkefnisstjórar þeirra verkefna, sem styrkt verða, halda þá stutta opna kynningu á fyrirhuguðu verkefni.